

清議報全編
全一冊
定價一元

清議報全編

第廿一冊
（清議報全編）
（清議報全編）

文苑出版社
有限公司印行

近代中國史料叢刊三編第十五輯

沈雲龍主編

清議報全編

新民主輯

第二十二卷至第二十四卷
第六集：紀事（庚子國難紀事本末、外國大事記、地球大勢、中外瑣記）

文海出版社

有限公司
印行

第陸集紀事

庚子國難紀事本末上
庚子國難紀事本末下

清議報全編

橫濱新民主社輯印

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



清議報全編卷二十二

第六集上之中

紀事二

庚子國難紀事本末上

拳匪源流

雍正五年十一月世宗憲皇帝諭內閣向來常有演習拳棒之人。自號教師。召誘徒衆。鼓惑愚民。此等多係游手好閒不務本業之流。而強悍少年從之學習。廢弛營生之道。羣居終日。尙氣角勝。以致賭博酗酒打降之類。往往由此而起。甚且有以行教爲名。勾引盜竊。擾累地方者。若言民間學習拳棒。可以防身禦侮。不知人果謹遵國法。爲善良。尙廉恥。則盜賊之風盡息。而鬪訟之累自消。又何須拳棒以防身乎。若使實有膂力勇健過人。何不學習弓馬。或就武科考試。或投營伍食糧。爲國家効力。以圖榮身上進。豈可私行教習。誘惑小民耶。着各省督撫轉飭地方官將拳棒一事嚴行禁止。如有仍前自號教師。及投師學習者。即行拿究。義和拳之起原。其可稽考者實始于此。

乾隆三十六年首先傳教之河南商邱縣人郜生文。犯案正法。當時凡入其教者。均稱爲南方離宮頭殿真人郜老爺門下。

嘉慶十三年江南之潁州亳州徐州府。河南之歸德府。山東之曹州府沂州府一帶地方。復

有不法棍徒。煽其餘波。招集徒黨。橫行鄉曲。給事中周廷森據情入告。仁宗命交江南安徽河南山東各督撫認真查辦。諭曰。給事中周廷森奏請嚴懲聚衆一摺。據稱近日江南之穎州府亳州徐州府河南之歸德府山東之曹州府沂州府兗州府一帶地方。多有無賴棍徒。拽刃聚衆。設立順刀會。虎尾鞭義和拳。八卦教名目。橫行鄉曲。欺壓良善。其滋事之由。先由賭博而起。遇會場市集。公然搭設長棚。押寶聚賭。勾通胥吏爲之耳目。請飭下三省督認真端緝。清查保甲。密訪爲首棍徒姓名。聚賭械鬪之案。拿獲盡法懲治。並責成地方官嚴定黜陟等語。江南安徽河南山東毗連各州縣。既有此等匪徒。自應嚴行懲辦。以靖閭閻。不可養癰貽患。至清查保甲。雖屬緝匪良法。但地方官寄耳目於里胥保正。設里保之中。皆其黨類。仍不肯據實舉報。總在府縣各官平日留心體訪。隨案查拿。將首犯嚴辦。使脅從者知懼。不敢隨同爲匪。自不致釀成巨案。株累多人。若胥吏等以在官人役。敢於通同包庇。尤應密拿重辦。剔除積蠹。著交江南安徽河南山東各督撫認真查辦。所有穎亳等處各府州縣。遴選廉明幹練之員。取其才堪治劇。而又能寬猛得宜。通曉事體者。責令隨時整頓。如此內有舊係簡僻缺分。而地方今昔情形不同。初任之員。難資治理者。不妨奏明更調。果能化俗宜民。著有成效。加以獎勵。闕茸不職者。立予糾參。

二十年欽差大臣那彥成拘獲部文生之孫部坦焯及劉功等。奏明科以凌遲之罪。此外如

青縣人李八葉。囑明等傳習義和門教一案。固城縣人葛立業。習義和拳棒。頂知逆情一案。青縣人尤明等傳習義和門離卦教一案。先後爲地方官拘獲。明正典刑。那彥成奏曰。奏爲遵旨查辦。並將先已訊出端倪。倪奏明密拿事。竊臣於十月三十日。承准軍機大臣字寄。十月二十九日。奉 上諭。王秉衡卽王景曾。其族分住直隸灤州及盧龍縣等處。以大乘教清茶門分往外省。傳徒斂錢。茲王秉衡自直隸至楚省。復來江南。柳有賢轉傳金帳。有傳至逆犯方榮。升釀成巨案。該犯實爲首禍。現已拿獲。解赴湖北。訊明嚴辦。昨據那彥成奏於盧龍緝獲王殿魁等犯。並查提王姓充徒各犯。分別審辦。石佛口王姓一族。世傳邪教。歷年久遠。蔓延數省。現已屢次犯案。着那彥成卽派委幹員前往灤州及盧龍等處。將王姓族中傳教之人。全數收捕。勿令兔脫一名。解至省城。嚴行審訊。訊明後。將爲首傳徒者。問擬絞決。其爲從者。分別發遣流徙。并向各該犯家中。嚴密搜查。將所藏九蓮如意皇極寶卷真經。元亨利貞鑰匙經。及一切邪悖經卷。全行起出。封送軍機處呈覽。務令盡絕根株。勿稍留遺孽。除惡務盡。切勿姑息。欽此。伏查臣前在河南辦理教匪。所有拿獲教犯。逐漸審訊。彼時卽係盛泰等。隨同辦理。臣卽屢諭盛泰等。令將各處習教之人。何處最多。傳至何人。逐人訊問。逐件留心。以備查辦。務絕根株。庶免別滋事端。而盛泰亦最肯用心存記。又在保定府任內。審辦邪教最多。是以直省傳習邪教源流。惟臣與盛泰稍知梗概。今欽奉諭旨。謹據臣等所知。畧爲陳

叙。當時據獲到教匪各供。滑縣鬧事之人。俱係震卦教。凡有在教者。均稱爲東方震宮王老爺門下。其王老爺係首先傳教之山東荷澤縣人王中。已於乾隆三十七年犯案正法。林清徒黨多。係坎卦教。凡有在教者。均稱爲北方元上坎宮孔老爺門下。其孔老爺係首先傳教之山東甯陽縣人孔萬林。亦已於王中案內正法。至大乘教金丹八卦教義和門如意門等教。凡有在教者。均稱爲南方離宮頭殿真人部老爺門下。其部老爺係首先傳教之河南商邱縣人部生文。已於乾隆三十六年犯案正法。又訊有清茶門教。係滑縣人王正紀所傳。當卽拿獲辦理。訊係灤州石佛口王姓分支。當時卽已飭令密記存查。臣於到任後。查辦各項教匪。查得嘉慶十六年經溫承惠審辦過鉅鹿縣民孫維儉等。係以吳二瓦罐所傳之好話教。卽離卦教。改名大乘教。賄串孔傳標借修尼山祠宇爲名。惑衆歛錢一案。將大會首孫維儉等五名。分別擬以絞決監候。二會首宋連捷等九十餘名。連吳二瓦罐一併擬遣。其散會首盧珍明等一千六百三十餘名。奏准取具悔結存記擋冊。再犯加等治罪。十七年又經溫承惠拿辦過前案內散會首復圖興教。私雕僞寶。印蓋護道榜文之劉峒名等三十餘名。口分別斬決發遣。是年又拿獲灤州李家民董懷信等三十餘名。傳習金丹八卦教。審出曾經入教男婦五千一百餘名。將董懷信等分別斬決發遣。其餘男婦取具悔結存案。十八年冬。大乘教案內擬絞監禁之大會首李經。在監勾結同教田克岐。散旗謀逆。經署督臣章煦及

臣在軍營訪聞。分起委員拿獲李經等。奉旨當下辦理。旋又究獲八卦教內首要逆犯張九成。楊遇山。宿元。謨。劉坤。并河南離卦教首部生文之孫。邵。坦。炤。劉。功。等。分案奏明。擬以凌遲斬遣。惟查愚民私相傳習邪教。一時原難稽查。是在地方官時刻留心於曾犯教案之犯。曾經習教之家。不動聲色。嚴密稽查。務使不驚不擾。隨案究其源流。庶可斷其傳習。臣仰荷皇上畀以畿輔重任。秉成指示。夙夜實力整飭。不敢稍存疏懈。斷不肯令邪惡復萌。釀成巨案。除陸續拿獲滑縣潛逃逆各犯。並林清案內應行緣坐餘黨不叙外。其離卦一教。仍未改悔之案。如所獲平安縣傳習離卦教之楊俊等。究出首先傳教吳二。瓦罐之千。仍稱少當家之吳洛雲。並其徒大頭目路運等一案。交河縣傳習一炷香離卦教之齊聞章等。搜出遞背十王經卷一案。滄州吳久治路老等傳習佛門教一案。青縣李八。葉。幅。明。等傳習義和門教一案。又青縣邊二。從。習。白。陽。教。預。知。逆。情。一。案。景。州。葛。華。等。從。習。離。卦。教。預。知。逆。情。一。案。祁州邢士魁等傳習如意教。搜獲妄造表名掛號總冊一案。故城縣葛立業傳習義和門拳棒預知逆情一案。均經訊明。教名雖別。俱係離卦教之子孫徒黨。遂起奏明。分別凌遲。斬遣在案。現又訪獲青縣尤明等傳習義和門離卦教一案。東鹿縣馬楊氏傳習紅陽縣搜飄高老祖經一案。亦經奏明從嚴究辦。至石佛口王姓傳教一案。臣先即存記。前在湯山差次面奉諭旨飭拿赴楚傳教之王姓。當經臣派員在盧龍縣安家樓莊。訪獲自江南回籍之王殿

魁。並其子王朝萬三犯。提省嚴訊。據王殿魁供認於乾隆五十七年。即在淮安溧水泗州江甯等處傳徒。伊即在山陽開糧食店。五六年回家一遍。據供出伊族人在湖北傳教。共有三人。一名王書魯。一名王泳太。一名王興建。王書魯先在江南儀徵縣傳教。即在彼住家。王泳太。王興建俱在盧龍縣安家樓莊住。又有在山西傳教犯案王如青之次子小名來子。伊族石佛口有兩支俱在。旗分東西兩院。王如青是東院人。其餘在安家樓莊及闔家莊係屬一支。俱係民人等語。續又據委員稟在安家樓莊拿獲王三樂王三畏二名訊據。供稱伊等均未習教。惟伊次兄王三聘。又名王紹英。曾在山西傳教犯案。業已奏辦。伊三兄王三顧。前亦往山西。回家後旋患瘋迷。於本年四月內外出。不知去向。臣以王三樂王三畏所供。全係狡卸。且該族之人類多傳教犯案。因查從前辦過王烈案內。有王際昌王漢倬王秉鈞三犯。分發邢臺等縣充徒。行司提省質訊。至王殿魁供出在湖北傳教之王書魯二犯。現准湖廣咨會內開樊萬興案內之王姓。即王大鼻子。已准江蘇省拿獲。核與王殿魁取供形貌相符。其王泳太王興建二犯。亦在湖北傳教。當即飛檄各委員飭拿。一面奏蒙聖鑒在案。今據白齡等奏。將緝獲之王秉衡即王景曾。解楚嚴辦。查與王殿魁供出在湖北傳教之王書魯名不相符。復提王殿魁研訊。據供王書魯原係景字排行。又名王景曾。即王大鼻子。屬實等語。臣業經咨會湖廣督臣審究。至王姓世習邪教。分往各省傳徒。蔓延數省。屢次犯案。怙惡不悛。且深

州。盧龍等處。附近京畿。並係盛京往來要路。斷難容習教匪犯。潛踪誘煽。誠如聖諭。必當將該族習教之人。全數收捕。分別懲辦。嚴密搜查。邪悖各經卷。務令盡絕根株。不使稍留餘孽。前經派委保定府同知汪洞。前赴該州密拿。已據獲到教犯王三樂。王三畏。王鳳吉。王來子等四名。已飭提省審辦。並仍令該員在於該州石佛口。盧龍縣。安家樓。及闌家莊等處。實力查拿。現又恭錄聖諭。密飭前委查勘永平府屬一帶道路之清河道。韓文綺。令其遵旨就近督拿該族習教之人。並搜查各項邪悖經卷。解省嚴行訊辦。斷不敢稍存姑息。以期仰副聖主除惡務盡之至意。

光緒今上初年。直隸冀州有土匪名黑虎者。滋事勢甚猖獗。官兵屢次勦辦。皆不能擒獲。維時李秉衡適為冀州知州。乃設法招撫。匪首徐某等編成義和團。惟黑虎抗不就撫。是為義和團所自始。今團匪總頭目聞即是黑虎也。

二十五年。毓賢任山東巡撫。當時省內已漸有多人借保護鄉閭為名。學習拳棒。浸假且有與外教為仇者。毓賢並不勦辦。且縱成之。故追原禍始。毓賢實首尸。其咎云。拳匪係離卦教。色尚紅。故紅巾紅帶。間有黃帶藍帶者。女童習紅燈罩。婦人習藍燈罩。降體之神。多半小說所云。樊梨花。劉金定之類。男子降神。更屬不倫。有曰李太白者。孫行者者。豬八戒者。楊香武者。並有曰祈禱藻者。其稱頭目曰大帥。曰老師父。小頭目曰大師兄。二師兄。每傳拳法一。

處。必須招集二十五人。是謂一團。每團立一團首。一團之人聚散皆從其令。故城縣拿獲山東大貴和尚。供稱該教咒語甚屬鄙俚。咒云。日出東方一滴油。驚動弟兄天下行。弟兄驚動李君王。李君王驚動楊二郎。楊二郎驚動封炮王。封炮王驚動老君來顯靈。納不解其義趣何在。因練拳而致邪祟附身。竟成瘋癲者。傳聞藉藉。愚民之愚。令人不解。有一兵官姓朱。自言係泰安府人。在濰縣二十里堡店中。言人入大刀會習學其藝。不怕槍刀火炮。欲學者並不爲難。其法即念咒燒紙燒香涼水潤身手足伸縮。一日即可成功。練拳之時。聚無知童子數人立向東南。傳教者手提童子右耳。令童子自行念咒三遍。其咒言爲我求西方聖母阿彌陀佛數字。咒畢童子即仰身倒地。氣幾不續。遲即促令起舞。或授以棍棒。當刀矛兩兩對戰。如臨大敵。實則如醉如夢。久之。師向該童子背心用手一拍。喚童本名。則豁然醒立。若木雞。拳法亦盡忘。與戰鬪時判若兩人。又別有咒語數種。或八字。或十二字。或十六字。二十字。以及十數句不等者。誘十數齡之童子。教其鬪疇。念咒向南三揖。該童子即仰臥地上。移時躍然而起。自報姓名。要皆前朝英傑也。報畢。即作拳勢。往來舞蹈。或持竹竿。秫秸。木槌等物。長者以當長槍大戟。短者以當雙劍單刀。各分門路。支撐衝突。勢極兇悍。幾于勇不可當。每演時必聚童子數十人合練之。其初學之一二日。由臥躍起。仍閉目跳舞。若置人物於其旁。則決無觸碍。舞畢欲退。則向南三揖。口稱老師父請回。該童子即復如常。由是練至數日之外。即不仰臥。不鬪疇矣。欲演拳勢。惟念咒一通。即時手舞足蹈。頗極超距之能。退時則一揖。

而罷。詢以練此何意。則衆口一詞。皆以預備殺逐洋人爲言。且云此等拳勇技擊。不過體操一端。將來尙須練習呼風喚雨飛雲走霧等術云。

喉拳實紀

二十六年四月。滿洲貴族世家多入義和團。王公貝勒等皆允爲保護。

五月初二。一問召見董福祥二次。面授以抵制西兵機宜。董福祥慷慨自効。有仰體慈意。誓立寸功之話。宮中內侍及年女宮女等。習學練拳。不時操演。○初十日。命順天府尹兼軍機大臣趙舒翹出京招撫團民。榮祿至馬家堡保護鐵路。或云實係會商董福祥力阻西兵不許入京。皇太后在宮內召集各大臣密議團匪亂事。爲時極久。旋即決議定計。不得將義和團勦除。以該團皆忠心于國之人。如以上等軍械好爲操演。即可成爲國家勁旅。以之抵禦洋人。頗爲有用。榮祿慶王端王剛毅啓秀趙舒翹等俱同聲附和。謂不可勦辦。乃即定議。時團匪幾于到處皆是。入會者日數百人。且均彰明較着。並不避忌。凡屬滿人。不分大小老少。均係義和團中人。其腰間均束紅帶。以作記號。御史王培佑召見時。太后問你是本處人。義和團究竟如何。王奏義和團忠君愛國。太后言惟願他莫亂動爲是。王奏臣家大小均練義和拳。太后大喜。三日卽擢府丞。○十一日剛毅奏言趙舒翹往撫團民。恐致決裂。奴才請即行。于是至涿州。趙舒翹欲留聶士成勦匪。剛素惡聶。謂其私通洋人。決不可用。趙微笑

即回京。有言官數人。奏請速發大兵。勦辦拳匪。以免匪勢蔓延。語頗切直。其疏留中不發。又有某御史專摺奏稱。拳匪滋事。皆剛毅釀成。非立賜罷斥。無以謝天下。聞者爲之動容。○十二日。剛毅奉派至北京一帶鎮撫團民。○十三日。董軍入都。先是董軍屯南苑。端王剛毅以城內空虛。請調入都。初四日召見。至是入都。先鋒差弁各持令箭。聲言奉太后命勦滅洋人。命義和團爲先鋒。我軍爲接應。○十四日。命端王管理總理衙門事務。團匪一隊與武衛軍相遇于某處。團匪謂之曰。爾敢拿我否。武衛軍答以不敢。團匪謂然。則爾可將帽除去。武衛軍即應聲悉將帽除下。武衛軍皆甚精壯。堪任戰事。董軍尤爲西人所推重。惟皆力助團匪。○十六日。董福祥呈請効力。願親自率帶所屬甘肅各兵往阻西兵進京。董軍約有二萬五千人。大半俱有極好機器快鎗。并機器快砲。以及刀鎗等類。大阿哥請義和團教師二人。教以各種幻術。以及拳棒等項。另有親王四人爲伴一體學習。○十九日。剛毅從涿州回京覆命。力主開戰之議。官兵在北京城外築造土壘。嚴加防堵。以阻西兵進京。又將砲位對准美國教堂。及英國使館安放。○二十日。董福祥偃與團匪聯合。并招集陝兵一同入會。召見王公貝勒六部九卿及翰詹科道。先召王公貝勒及榮祿。剛毅密議後。復同各漢臣進見。太后宣布開戰之議。王文韶許景澄袁昶曾廣漢惲毓鼎朱祖謀那桐等皆力爭云。現在各國兵艦雲集。萬不能戰。剛云。有團民足恃。袁云。曾微服往東交民巷見匪中鎗而死。

者。伏尸徧地。並不能避鎗砲。究不足恃。太后云此係土匪。決非團民。若係團民。決不至中鎗砲。曾云昔與日本一國開戰。尙不能勝。今與各國開戰。豈有勝理。那云城內斷不能作戰地。俛云即欲開戰。所有各使館宜照公法一律保護。朱云宜召近省知兵大員入京再議。王文韶及徐用儀以保護使臣爲主。剛遽云無論如何。現在總以阻截西兵入京爲第一要事。許景澄熟識洋務。當可派往。于是太后即加派那桐同往。而開戰之議遂定。朝中諸人無日不稱述團匪神奇。某大臣至向衆明言此等義和團皆是天生奇材。有無窮法術。可以包打西人。故西兵如欲進京。我等亦不必阻止。聽其與團匪打仗。俾知團民之利害。某御史封章入告。謂義和團志在保衛國家。其志可嘉。其技可用。請爲酌給口糧。編成制兵焉。當團匪滋事以後。太后曾召見諸大臣商議勦撫事宜。諸臣皆無定見。惟徐桐叩首力爭。謂團匪立意扶清滅洋。實是中國義民。不宜勦辦。以挫其氣。太后以徐爲老臣。所言必不悞。故一意主撫。○廿四日。甘軍在王府大街長安牌樓北與奧署洋兵開仗。鎗砲聲大作。飛彈如雨。忽忽有聲。竟夜不絕。榮祿之命也。當議發令時。皇上痛哭言曰。如此則數千萬生靈。必遭塗炭。三百年宗社。必致不守。諸臣爭之甚力。太后不能作主。遂即下令。○廿五日。下開戰之諭。其言曰。我朝二百數十年。深仁厚澤。凡遠人來中國者。列祖列宗。罔不待以懷柔。迨道光咸豐年間。俯准彼等互市。並乞在我國傳教。朝廷以其勸人爲善。勉允所請。初亦就我範圍。遵我約束。

詎三十年來。恃我國仁厚。一意拊循。乃益肆梟張。欺凌我國家。侵犯我土地。蹂躪我民人。勒索我財物。朝廷稍加遷就。彼等負其凶橫。日甚一日。無所不至。小則欺壓平民。大則侮慢神聖。我國赤子。仇怨鬱結。人人欲得而甘心。此義勇焚燒教堂。屠殺教民所由來也。朝廷仍不開釁。如前保護者。恐傷吾人民耳。故再降旨申禁。保衛使館。加恤教民。故前日有拳民教民。皆吾赤子之論。原爲民教解釋宿嫌。朝廷柔服遠人。至矣盡矣。乃彼等不知感激。反肆要挾。昨日公然有杜士蘭照會。令我退出大沽口炮臺。歸彼看管。否則以力襲取。危詞恫喝。意在肆其披猖。震動畿輔。平日交鄰之道。我未嘗失禮於彼。彼自稱教化之國。乃無禮橫行。專恃兵堅器利。自取決裂如此乎。朕臨御將三十年。待百姓如子孫。百姓亦戴朕如天帝。况慈聖中興。宇宙恩德所被。浹隨淪肌。宗祖憑依。神祇感格。人人忠憤。曠代所無。朕今涕泣以告先廟。慷慨以誓師徒。與其苟且圖存。貽羞萬古。孰若大張撻伐。一決雌雄。連日召見大小臣工。詢謀僉同。近畿及山東等省義兵。同日不期而集者不下數十萬人。下至五尺童子。亦能執干戈以衛社稷。彼仗詐謀。我恃天理。彼憑悍力。我恃仁心。無論我國忠信甲冑。禮義干櫓。人人敢死。卽土地廣有二十餘省。人民多至四百餘兆。何難剪彼兇燄。張國之威。其有同仇敵愾。陷陣冲鋒。抑或尙義捐資。助益餉項。朝廷不惜破格懋賞。獎勵忠勛。苟其自外生成。臨陣退縮。甘心從逆。竟作漢奸。卽刻嚴誅。決無寬貸。爾普天臣庶。其各懷忠義之心。共洩神人之

憤。朕實有厚望焉。下嘉獎義和團之諭。曰。裕祿奏洋人肇衅。猝啓兵端。連日接仗。獲勝一摺。覽奏實深嘉慰。我華與各國和好有年。乃因民教相仇之故。竟至決裂。恃其堅甲利兵。攻我大沽口炮臺。又由紫竹林分路出戰。經裕祿四處分應。經我義民竭力相助。以血肉之軀。與鎗炮相薄。二十一二二十三等日。擊壞兵輪二艘。殺敵不少。衆志成城。民心既固。兵氣亦揚。所有助戰之義和團人民。不用國家一兵。不糜國家一餉。甚至髻齡童子。亦復執干戈以衛社稷。此皆仰託祖宗之昭鑒。神聖之護持。使該團民萬衆一心。有此義勇。着先行傳旨嘉獎。餘俟事定後再行加恩。爾團民等惟當同心戮力。禦侮効忠。始終勿懈。朕有厚望焉。

命各省督撫招集團民以禦外侮。命莊親王載勛補授步軍統領。○二十六日。命莊王剛毅統率義和團。英年載瀾會同辦理。文瑞爲翼長。命戶部札放粳米二萬石交剛毅分給義和團民食。○二十七日。命各督撫將軍分飭各營旂將舊存槍炮刀矛各種軍械。趕緊修理。並添造子藥。酌帶專件。以備民團領用。○二十九日。太后命賞給神機營虎神營義和團民銀各十萬兩。甘軍武衛軍再各賞銀六萬兩。○三十日。太后命賞給八旗滿蒙漢驍騎營銀一萬兩。兩翼前鋒八旗護軍一萬兩。天津開戰各兵士及助戰團民十萬兩。宋慶武衛左軍十萬兩。上諭中外開衅以來。我皇太后迭次頒發內帑。徧給將士義團。慈恩優渥。有加無已。當此時局艱危。爾將士等必當感激圖報。共建殊勳。其有奮勇力戰。殺敵致果者。定予

以不次之賞。如有臨陣退縮。畏葸不前者。卽在軍前正法。並將統兵各員嚴治其罪。現在大沽炮臺已被洋人佔據。著裕祿督飭羅榮光等各營。並義和團民迅圖恢復。毋稍遷延。至行軍以紀律爲先。各營弁兵。如有搶掠財物騷擾地方等情。除將滋事弁兵就地正法外。並將該管營哨各官以軍法從事。倘統帶各員不能嚴加約束。亦必一併從嚴治罪。勿謂言之不預也。上諭昨已將團民仇教勦撫兩難。及戰釁由各國先開各情形諭。李鴻章李秉衡劉坤一張之洞等矣。爾各督撫度勢量力。不欲輕搆外衅。誠老成謀國之道。無如此次義和團民之起。數月之間。京城蔓延已遍。其衆不下十數萬。自民兵以至王公府第。處處皆是。同聲與洋教爲仇。勢不兩立。勦之則卽刻禍起肘腋。生靈塗炭。只合徐圖挽救。奏稱信其邪術以保國。似不諒朝廷萬不得已之苦衷。爾各督撫知內亂如此之急。必有寢食難安。奔走不遑者。安肯作一面語耶。此乃天時人事相激相隨。遂致如此。爾各督撫勿再遲疑觀望。迅速籌餉。力保疆土。如有疏失。唯各督撫是問。上諭團軍與洋人爲難情形。前曾疊諭李鴻章張之洞李秉衡等會同籌議覆奏。茲據奏到言兵衅萬不可開。團軍急宜勦除等語。誠老成謀國之見。無如此種團軍。京津一帶。已不下十餘萬人。聲勢赫翼。誓與洋教爲難。甚至宮禁前後。所在多有。勦之轉恐患生不測。不若因而用之。尙可轉危爲安。此乃天時人事相迫而成。各督撫毋得再行觀望。徒事委蛇。務須振刷精神。籌餉練兵。各保疆土。倘有疎虞。惟各督撫

是問

六月十六日上諭統帶武衛前軍直隸提督聶士成。從前著有戰功。訓練士卒。亦尙有方。乃此次辦理防勦。種種失宜。屢被參劾。實屬有負委任。昨降旨將該提督革職留任。以觀後效。朝廷曲予矜全。望其力圖振作。藉贖前愆。詎意竟於本月十三日督戰陣亡。多年講求洋操。原期殺敵致果。乃竟不堪一試。言之殊堪痛恨。姑念該提督親臨前敵。爲國捐軀。尙非退蕙者比。着開復處分。照提督陣亡例賜卹。用示朝廷格外恩施。策勵戎行之至意。○二十一日上諭各國開釁。京津各軍尙皆可用。惟聶士成一軍。平日第講洋操。臨敵爲洋教習所制。以致未戰先潰。委械授鉞。兵弁中有人洋教者。甚至倒戈相向。甘心從逆。而其沿用洋裝洋號。輒動自相猜疑。自相鬪殺。誤國亡身。實堪痛恨。各路統兵大臣。凡夙習洋操。及用洋操式。洋口號者。務即悉數更換一律。仍歸舊日兵制。其中如有入教及私通洋人兵弁。尤宜嚴加分別。認真淘汰。俾兵爲我用。不以資敵。將此由六百里通諭知之。○二十二日上諭義和團民爲國宣力。人數旣衆。良莠不齊。甚且有意尋仇。肆行無忌。本月竟有僞義和團戕殺副都統慶恒家屬一案。當經該統率王大臣查明將該僞義和團正法五人。乃聞尙有人嘵嘵不已。竟將慶恒凌虐至死。殊屬不知法紀。着該王大臣確切查明。務將真正義和團衆。盡其恪守戒規。義以和衆。其有匪徒假託義和團之名。尋衅焚殺。着照土匪之例。即行嚴辦。經此次淘

汰後。義和團之真心向善者。益當愛惜聲名。同心禦侮。其僞託之匪徒。自無所逃於顯典。從此涇渭攸分。當亦該團之所深願也。

十六

七月初一日。命李秉衡幫辦武衛軍務。節制張春發陳澤霖萬本華夏卒西四管。○初四日。吏部左侍郎許景澄太常寺卿袁昶以諫阻請勦匪忤旨正法。先是五月間。三次召見王大臣。許袁二公卽力陳團匪不可信。宜勦不宜撫。卽會銜密奏。六月初旬。團匪攻使館益力。二公復相約曰。當冒死力爭。又會銜上疏。不聽。而袒護拳匪者啣之。謀害甚急。至六月下旬。西兵屬集。勢將直撲都城。乃又會銜上疏。請速勦匪。並請誅袒護拳匪之人。遂於先一日逮刑部獄。至是奉旨正法。許袁共上疏三次。其第一疏曰。竊見自本月十六七日。拳匪倡亂京師。連日召見王貝勒內外廷臣工。聖躬焦勞。爲宗廟社稷深維至計。廣諮下問。臣等不能弭患。事先紓君父之憂勞。負罪無狀。內愧且憤。伏查嘉慶十三年七月。上諭卽有山東河南一帶匪徒設立八卦教義和拳名目。實係白蓮教餘孽。奉嚴旨密拿懲辦。去年吳橋縣知縣勞乃宣說帖。考之最詳。前月東撫袁世凱遵旨覆陳。言萬無招撫編爲營伍之理。言之最爲切實。明白。前東撫毓賢辦理平原縣邪匪一案。稱匪首朱紅燈。自稱明裔。妖言煽亂。各處響應。幸被官兵掩捕擒獲。就地正法。絕無能避槍砲刀斧之妖術。此其明証。上年臣詢提督程文炳。該提督乙未年駐軍近畿。有山東義和拳。自稱金鐘罩紅燈照名目。四五十人投効。以火

槍利刃試其技。立時見血傷斃。是妖術全不可信。確鑿無疑。而其匪首廣樹黨羽。久蓄逆謀。妄稱明裔煽亂。其爲邪教爲亂民。又確鑿無疑。臣於上年十一月十三日蒙恩召見。其時東省拳匪借仇教爲名滋事。臣曾面奏。係邪教倡亂。應預爲撲滅。各情。旋經東撫袁世凱實力禁撲。止滅十餘巨股。東省晏然。始而士紳誤信騰謗。謂該撫不應用勦。此皆不學無識之徒。以邪爲正。近亦帖服。以該撫辦理爲是。臣去年冬。曾以勞乃宣說帖商之總署。諸臣奏明請旨飭下東撫辦理。旋因東撫辦有頭緒。遂寢未奏。不意東省漸次肅清。流入直隸。直隸督臣觀望遷延。養癰成患。聽其蔓延。始謀不臧。咎實難辭。及涿水戕官。督臣裕祿見該邪匪借仇教爲名。叛逆昭著。乃電奏力請勦辦。而內外議有異同。遲延未決。涿州踞城不已。延及永清霸州。涿水戕官未痛辦。遂致匪膽愈張。焚燬蘆保鐵路。京津鐵路電桿。又毀京津至張家口電線。此皆國家派員出內帑借洋款所經營。一旦焚毀。數百萬巨貲。深堪惋惜。又焚殺教堂。教民數百處。將來議償亦不貲。伏以民教互仇。積成憤毒。地方官稟承國家律令。自有平心讞獄辦法。但憑案情曲直。不分是民是教。斷不容匪徒自行報復。乃自本月十六七日。該匪膽敢潛入京師。盜兵輦轂之下。焚毀教堂。攻擊各使館。縱橫恣肆。放火殺人。震驚宮闕。實爲罪大惡極。萬不可赦。二十日焚燒前門外千餘家。京城財產精華所聚。焚掠一空。士民搬徙。十室九逃。商賈盡行閉歇。失業。餉項亦艱於匯兌。給發。氣象蕭索已極。自有亂民不法。任其

焚殺吽喊。實貽鄰國之恥笑。各洋公使因匪仇教。畏其凶鋒。情急自衛。現兵祇有四百十餘人。各保性命。是其實情。十六日樞臣啓秀等傳諭旨慰問各使館。並及公使之語。該公使等感戴聖慈。淪肌入髓。口稱調洋兵爲衛館保命。絕不干預中國國家公事。匪平無事。卽行撤回。指天誓日。其詞決非虛僞。爲今之計。惟有先清內城之匪。以撫定民心。慰安洋情。方可阻其續調之兵。必中國自勦。乃可免洋兵助勦。情勢顯然。臣伏思兵事最忌多立統帥。意見參差。事權不一。以致互相觀望。轉誤事機。現在歷奉嚴旨。飭令步軍統領武衛中軍與各御營禁兵。嚴拿首要各犯。刻卽解散脅從。將城內外設立壇棚。盡行拆去。乃官兵觀望拳匪橫行如故。步軍統領順天府五城。前遵旨所擬十條章程。實止虛文。何曾實力做到。此事權不一之故也。拳匪層聚京城。久且煽惑愈多。致生巨變。伏乞皇太后皇上赫然震怒。恭行天討。上安九廟。下靖兆民。宜專責成大學士榮祿。兼用且勦且撫之法。得以便宜從事。先肅清內城地面。遵旨立即出示。徧諭軍民人等。凡遇頭繫紅布。身繫紅帶。持刀放火殺人。之匪。准其格殺勿論。並懸重賞之格。縛獻匪首。所謂老祖師大師兄者。賞銀二萬兩。立即超擢官階。擒斬該匪團長。賞銀五百兩。餘匪計首一級。賞銀一百兩。均准報名候奏獎。該大學士爲國重臣。應扼要坐鎮。不宜勞以細事。須差委得人襄助。乃可分理。伏見武衛軍幕僚。記名道府樊增祥。素有謀畧。內閣學士桂春。忠勇明決。編修王廷相。御史黃桂馨。素有清操。通達事理。

府丞兼署府尹陳夔龍勇於任事。請旨交大學士榮祿參贊謀畧。遴派武衛中軍得力將弁。挑選勁兵。分爲十餘隊。隊長如得力。每隊止槍手刀斧手二三百人。已足。請旨暫閉前三門。嚴禁游民。祇准其出不准其進。分路搜捕匪徒。務令各空廟廢祠。根株淨盡。復命提督衙門刑部遴派明幹司員多人。分駐各汛段官廳。隨將所拏匪徒。畧訊口供。稟明統帥。即行就地正法。以儆凶頑。餘者解散。驅逐出外城之外。遞解回籍。事平再行將正法若干匪。造冊奏報。或謂該匪人多不可勦。不知祇匪首倡亂。餘多愚蠢村農。幼壯不一。或謂匪有邪術。臣愚以爲漢末張角黃巾。元末破頭潘關先生。皆有妖術。卒歸擒斬。該匪晝伏夜動。動言請神。此乃符咒扶鸞。請仙五鬼搬運之邪術。一遇聲光並見之物。陽氣熾烈。如槍砲等物。立即蠱斃。若云匪術能避槍礮。何以十六七等日。該匪連攻東交民巷使館。洋兵放槍立斃數匪。昨又擊斃師府胡同拳匪四十餘名。拆毀其壇。京師軍民數百萬。受國厚恩。實無一謀叛者。叛逆祇拳匪首要數人耳。一經擒斬。中國法儆人心。匪膽即寒。民志自大定。外五城御史街道廳。亦應督同綠營練勇水會一體照辦。城匪既清。各公使館蒙天恩保護。感激再生之恩。則續調之洋兵。自可阻其來。即來亦可以城匪既清。無庸自行保護。折之。令其撤回。總之周禮稱治亂國用重典。康誥稱用其義刑義殺。內匪事在必勦。無可游移。若因循不勦。招撫之亦不受命。各國勢大怨深。並舉報復。禍敗不可勝言。與其外兵干預代行勦辦。必至拳匪洋兵互

相鬪。喋血京師。轉致玉石不分。殺害無數良民。大局糜爛。不可收拾。不如我自行勦辦。尙可示以形勢。杜彼族之口實。以維持大局。廟社不驚。萬民幸甚。其第二疏曰。竊自上月二十四日。德國使臣葛德祿。途遇槍斃之後。該匪遂攻擊各國使館。提督董福祥所統甘軍。尤與聲勢相倚。狼狽爲虐。使館附近居民。遭池魚之殃者。不可勝計。東城一帶。京官私宅。劫掠殆盡。該匪旣以仇教爲名。波及使館。復以攻使館之故。波及官民。輦轂之下。任彼亂軍亂民。縱橫盪決。伊古伊今。實爲罕見。當匪徒初攻使館時。莫不謂旦夕間。便可剷除。董福祥日屢以使館盡燬告矣。今已二十餘日。洋兵死者寥寥。而匪徒骸骨狼藉。徧於東交民巷口。平日妖言惑衆。自詡能避槍礮之術。而今安在。夫以數萬匪徒。攻四百餘洋兵所守之使館。至二十餘日之久。猶未能破。則其伎倆亦可概見。尙得恃其血氣之勇。收禦侮之效哉。若云眞義和團。確能爲國宣力。其尋釁焚殺。皆依附其間之僞義和團所爲。一類之中。旣分眞僞。擾亂已極。且旣容附入之僞者。無惡不作。則眞者亦非善類可知。况歷奉嚴旨。禁止持械尋仇。焚燬劫掠。并令解散出城。該匪竟置若罔聞。橫行如故。無論眞僞。總之藐視王法。均爲冥頑不靈。罪在不赦。愈撫則愈聚。愈縱則愈驕。臣前次奏請。宜專責成大學士榮祿。用且勦且撫之法。未蒙俞允施行。今禍亂日亟。愚妄之見。尤不敢不冒死瀆陳於聖明之前。伏以春秋之義。兩國搆兵。不戮行人。泰西公法。尤以公使爲國之重臣。蔑視其公使。卽蔑視其國。玆若任命

該匪攻燬使館。盡殺使臣。各國引爲大恥。連合一氣。致死報復。在京之洋兵有限。續來之洋兵無窮。以一國而敵各國。臣愚謂不獨勝負攸關。實存亡攸關也。我國家與泰西各國通商垂六十年。准其各省傳教。平日教民。倚勢魚肉鄉里。以洋教士爲護符。地方官或者希圖了事。抑制平民。亦屬不免。民心怨忿。仇視教民。是皆臣等辦理不善。貽害至今。負罪實甚。臣何敢謂民教相仇。其曲全出於民。特任令自相報復。殊失國體。譬如鄉里之間。兩家有隙。而子弟僮僕。肆行鬪狠。燬隣居之室。而殺其閹人。爲家主者。不能禁止。而鄰居之詰問。必不向子弟僮僕。而向家主。爲家主者。又烏得以子弟僮僕。不受約束。而置身事外。以小喻大。其理相同。且泰西各國之教。有宗天主教者。有宗耶穌者。傳天主教者曰神父。傳耶穌教者曰牧師。該匪亦不辨爲所傳何教。統以洋教呼之。而俄國向宗希臘。日本向宗佛教。該二國從無入內地傳教之事。該匪更不知何國有傳教之人。何國無傳教之人。見異服異言者。統呼之爲毛子。銳以彌難爲快。無論勢有所不可。理有所不宜。且我駐洋各使臣。非銜命而出者乎。若各國以我殺其使臣。而不勝忿忿。先殺我使臣以償之。是直易刃而自殺其使臣也。朝廷方賜各使館蔬果米麥。以示懷柔。該匪乃倚驕。將爲護符。肆行攻擊。外人轉疑朝廷陽欺陰袒。謂非縱令恣意凌轢。其誰信之。夫使館無恙。將來與各國復歸於好。各使臣受皇太后皇上懷柔之恩。自當激發天良。剖言禍之肇自拳匪。猝不及防。非朝廷姑息所致。釋其本國疑忌之

心事半功倍。轉圜較易。若使館盡燬。使臣盡戮。則我皇太后皇上。此時懷柔之恩。外人烏從而知之。欲自釋於各國。雖百喙亦無從解免。今各國紛紛調兵。以代勦匪爲辭。疑之者謂乘機窺竊。信之者謂其心無他。臣愚莫測其究竟。而拳匪種種無法。早當痛勦。本不待外人諄請。更何待外人代庖。臣愚請保全使館。爲將來轉圜地步。一面嚴旨切責提督董福祥。飭令甘軍悉行退紮城外。不許重至東交民巷。比暹匪徒。向各使館攻擊。違者即行正法。使兵相離。匪勢較弱。則勦除亦較易。一面仍請責成大學士榮祿。尅期將拳匪一律驅逐出城。以救燃眉之急。再圖勦洗。永杜後患。臣亦知飛蝗蔽天。言出禍隨。顧念存亡呼吸。區區螻蟻微忱。不忍言亦不忍不言。是用冒死具奏。其第三疏曰。竊自拳匪肇亂。甫經月餘。神京震動。四海響應。兵聯禍結。牽掣全球。爲千古未有之奇事。必釀成千古未有之奇災。昔咸豐年間之髮匪捻匪。負隅十餘年。蹂躪十數省。上溯嘉慶年間之川陝教匪。淪陷三四省。竊據三四戰考之。方略見當時興師振旅。竭中原全力。僅乃克之。至今視之。則前數者皆手足之疾。未若拳匪爲腹心之疾也。蓋髮匪捻匪。教匪之亂。上自朝廷。下至閭閻。莫不知其爲匪。而今之拳匪。竟有身爲大員。謬視爲義民。不肯以匪目之。亦有知其爲匪。不敢以匪加之者。無識至此。不特爲各國所仇。且爲各國所笑。查拳匪揭竿之始。非有槍礮之堅利。戰陣之訓練。徒以扶清滅洋四字號。召不逞之徒。烏合肇事。若得一牧令將弁之能者。蕩平之而有餘。前山東

巡撫毓賢養難於先。直隸總督裕祿禮迎於後。給以戰具。附虎以翼。夫扶清滅洋四字。試問從何解說。謂我國家三百餘年。深恩厚澤。浹於人心。食毛踐土者。思効力馳驅。以答載覆之德。斯可矣。若謂際茲國家多事。時局維艱。草野之民。具有大力。能扶危而爲安。扶者傾之對。能扶之即能傾之。其心不可問。其言尤可誅。臣等雖不肖。亦知洋人窟穴內地。誠非中國之利。然必修明內政。慎重邦交。觀釁而動。擇各國中之易與者。一震威權。川雪積憤。設當外寇入犯時。有能奮發忠義。爲滅此朝食之謀。臣等無論其力量何如。要不敢不服其氣概。今朝廷方與各國講信修睦。忽創滅洋之說。是謂橫挑邊釁。以天下爲戲。且所滅之洋人。指在中國之洋人而言。抑括五洲各國之洋人而言。僅滅在中國之洋人。不能禁其續至。若盡滅五洲各國。則洋人之多於華人。奚啻十倍。其能盡滅與否。不待智者知之。不料毓賢裕祿爲封疆大員。識不及此。裕祿且招攬拳匪頭目。待如上賓。鄉里無賴棍徒。聚衆千百人。持義和團三字名帖。即可身入衙署。與該督分庭抗禮。不亦輕朝廷而羞當世之士耶。靜海縣之拳匪張德成。曹福出。韓以禮。文霸之王德成等。皆平日武斷鄉曲。蔑視官長。聚衆滋事之棍徒。爲地方巨害。其名久著。土人莫不知之。即京師之人亦莫不知之。該督公然入諸奏報。加以考語。爲錄用地步。欺妄君上。莫此爲甚。又裕祿奏稱。五月二十夜戌刻。洋人索取大沽礮臺屯兵。提督羅榮光堅却。不允。相持至丑刻。洋人竟先開砲攻取。該提督竭力抵禦。擊壞洋人停

泊輪船二艘。二十二日。紫竹林洋兵分路出戰。我軍隨處截堵。團民分起助戰。合力痛擊。殺燬租界洋房不少。臣詢由津避難來京之人。僉謂擊沈洋船。焚燬洋房。實屬並無其事。而我軍及拳匪。被洋兵轟斃者不下數萬人。異口同聲。決非謠傳之說。甚有謂二十日。洋人攻擊大沽砲臺。係裕祿令拳匪攻紫竹林。先行挑釁等語。此說或者衆怨攸歸。未可盡信。而誣報軍情。竟與提督董福祥。詐稱使館洋人焚殺盡淨。如出一轍。董福祥本係甘肅土匪。窮迫投誠。隨營効力。積有微勞。蒙朝廷不次之擢。得有今職。應何等束身自愛。仰答高厚鴻慈。乃比匪爲奸。形同寇賊。迹其狂悖之狀。不但辜負天恩。益恐狼子野心。或生他患。裕祿歷任兼圻。非董福祥武員可比。而竟憤憤乃爾。令人不可思議。要皆希合在廷諸臣。謬見誤爲我皇太后。皇上聖意所在。遂各倒行逆施。肆無忌憚。是皆在廷諸臣。欺飾鋼蔽。有以召之也。大學士徐桐。素性糊塗。罔識利害。軍機大臣協辦大學士剛毅。比奸阿匪。頑固性成。軍機大臣禮部尙書啓秀。膠執已見。愚而自用。軍機大臣刑部尙書趙舒翹。居心狡猾。工於逢迎。當拳匪甫入京師之時。仰蒙召見。王公以下內外臣工。垂詢勦撫之策。臣等有以團民非義民。不可恃以禦敵。無故不可輕與各國開釁之說進者。徐桐剛毅等。竟敢於皇太后皇上之前。面斥爲逆說。夫使十萬橫磨劍。果足制敵。臣等凡有血氣。何嘗不願聚彼族而殲旃。否則自誤以誤國。其逆恐不在臣等也。五月間剛毅趙舒翹奉旨前往涿州解散拳匪。該匪勒令跪香。語多

譴罔。趙舒翹明知其妄語。其隨員人等。則太息痛恨。終以剛毅信有神術。不敢立異。僅出告示數百紙。含糊了事。以業經解散覆命。既解散矣。何以羣匪如毛。不勝翺燕。似此任意妄奏。朝廷盍一詰責之乎。近日天津被陷。洋兵節節內逼。曾無拳匪能以邪術阻令前進。誠恐旬月之間。勢將直撲京師。萬一九廟震驚。兆民塗炭。爾時作何景象。臣等設想及之。悲來填膺。而徐桐剛毅等。談笑漏舟之中。晏然自得。一若仍以拳匪可作長城之恃。盈廷惘惘。如醉如癡。親而天潢貴胄。尊而師保樞密。大半尊拳匪。神而明之。甚至王公府第。聞亦設有拳壇。拳匪愚矣。更以愚徐桐剛毅等。徐桐剛毅等愚矣。更以愚王公。是徐桐剛毅等。實爲釀禍之樞紐。若非皇太后皇上立將首先袒護拳匪之大臣。明正其罪。上伸國法。恐廷臣僉爲拳匪所惑。疆臣之希合者接踵而起。又不止統賢裕祿數人。國家三百年宗社。將任謬妄諸臣。輕信拳匪。爲孤注之一擲。何以仰答列祖列宗在天之靈。臣等愚謂時至今日。間不容髮。非痛勦拳匪。無詞以止洋兵。非誅袒護拳匪之大臣。不足以勦拳匪。方匪初起時。何嘗敢抗旨辱官。毀壞官物。亦何敢持械焚劫。殺戮平民。自徐桐剛毅等。稱爲義民。拳匪之勢益張。愚民之惑滋甚。無賴之聚愈衆。使統賢去歲能力勦。該匪斷不致蔓延至直隸。使今春裕祿能認真防堵。該匪亦不至闖入京師。使徐桐剛毅等。不加以義民之稱。該匪尙不敢大肆其焚掠殺戮之慘。推原禍首。罪有攸歸。應請旨將徐桐剛毅啓秀趙舒翹裕祿統賢董福祥。先治以應。

得之罪。不得援議貴議親為之末減。庶各國恍然於從前縱匪肇釁。皆謬妄諸臣所為。並非國家本意。棄仇尋好。宗社無恙。然後誅臣等以謝徐桐剛毅諸臣。臣等雖死。當含笑入地。無任流涕具陳。不勝痛憤惶迫之至。

拳亂實紀

二十五年十一月廿六日。山東肥城縣境內義和拳肇亂。殺害英國教士卜克斯。是為拳亂之始。上命山東巡撫袁世凱奏參肇亂該管地方官。并一面勒限嚴拿懲辦。旋捉獲匪首孟洗汶吳方城吳經明龐燕木李潼關等多名。

二十六年。斬決肥城縣案犯孟洗汶吳方城。給卹建造教堂銀九千兩。天津附近百八十里地方。團匪勢漸猖獗。官兵往勦。敗焉。

三月初三日。山東拳匪蔓延至直隸境內。各國擬派兵至京。官兵與團匪戰于任邱。統帶官及知府負傷。兵士死者甚眾。○十三日山東團匪搶掠高密城外鐵路公司。管路工人紛紛逃至濰縣膠州避難。政府派兵七千名向山東進發。天津城內外幼童演練義和拳。幼女演練紅燈照。謠言四起。保定東呂村團匪蠢動。與教民為難。幾釀禍端。團匪竄至保定。約合萬人屯扎于南門外。徧貼匿名揭帖。聲稱于某日起事。人民驚惶異常。○十五日直隸境內匪勢孔亟。張南登鎮新店一帶。共聚有千餘人。保定府官沈某檄令清苑縣令馳往查

辦。白河溝匪聲言定期拆燬教堂。榮祿電飭督標張某前往相機辦理。文安霸州安州固安雄縣一帶匪拳蠢動。直隸總督裕祿札飭督標派員督兵彈壓。山東東昌團匪擄去教士男女四。直隸河口附近一帶匪黨甚衆。爲首數人由山東至。改名其莊爲義和莊。每當夜靜。到處焚表讀咒。清苑縣南鄉之張天莊謝莊蔣莊張登等村附近一帶。拳匪與教民爲難。教民先有準備。相持至兩點鐘之久。西苑縣令帶練軍馳往彈壓。兩下皆互有損傷。○二十二日團匪潛至京師。徧黏招帖于教堂。聲言三月杪起事。與教民爲難。法教士某見之。咨照步軍統領衙門派勇保護。○二十七日保定南門外姜家莊團匪聚集二千人。相約往攻有教民之村莊。教民逆知之。先期整備以待。至日方晨。拳匪網至。彼此相持許久。互有損傷。總署派馬兵一隊至通州以爲防禦。四月初三日。山東臨清匪勢漸盛。大有發難之勢。山東各處徧貼招帖。其詞云。神助拳。義和團。只因鬼子鬧中原。勸奉教。乃霸天。不敬神佛忘祖先。男無倫。女鮮節。鬼子不是人所生。如不信。仔細看。鬼子眼睛都發藍。不下雨。地發乾。全是教堂止住天。神爺怒。仙爺煩。伊等下山把道傳。非是謠。非白蓮。口頭咒語學真言。升黃表。焚香烟。請來各等衆神仙。神出洞。仙下山。扶助人間把拳頑。兵法易。助學拳。要擯鬼子不費難。挑鐵道。把線砍。旋再毀壞大輪船。大法國。心胆寒。英吉俄羅勢蕭然。一概鬼子全殺盡。大清一統慶昇平。京城內外團匪布造。

謠言云。在溫泉山煤洞中掘出前明劉青田所書石碑一方。其文曰。庚子之年。日照重陰。君非桀紂。奈佐非人。最恨利約。誤國殃民。上行下效。民冤不伸。原忍至今。羽翼洋人。趨炎附勢。肆虐同羣。逢大曹怒。假手良民。紅燈下照。民不迷津。義和團教。不約同心。全重漂洋孽。時逢本命宮。待當重九日。剪草自除根。京城東安門內河沿各巷。有人自號義和團教師。小兒從之。練拳。日繁有徒。○初八保定附定出有私黨。名曰紅燈照。專十夜間出外行事。日間並不見蹤跡。直隸各處匪勢甚盛。焚毀距北京西南二百里之來順村法國教民房屋。殺戮教民七十三名。○廿一日各國使臣集議調兵入都。教民避禍于京師者踵趾相接。涿水村天主教民爲匪圍殺。教民七十三人。半爲所焚斃。有欲脫逃者。亦被截殺斃命。○廿三日。楊雲峰副將奉派至涿水縣彈壓拳匪。中伏陣亡。所部馬隊七十餘人。悉遭屠戮。督署聞報。添派馬兵一隊前往痛剿。初涿水定興交界處村民奉教者衆。有武舉某相遇必怒色向之。而教民亦不之懼。兩不相下。積嫌成仇。一日該舉人與教民某訟於官。不得直。罰令該舉人出制錢四百千。酒菜二十席。該舉人引以爲恥。欲報之而苦無良策。會山東義和團方起事。聞有異術。於是破家傾產。聘數人至該村。教平日附從於己而能爲出力者。此數人儼然以大教師。二教師。三教師等自名。誦咒弄鬼。焚香播神。幾無虛日。教民知禍將及己。即報於官。縣令祝大令據報詳稟上臺。皆以爲若輩徒自擾。何足爲大患。旋各教士亦懇請豫爲保護。

姑令馬隊營分統楊雲峰副戎率其部下往。僅僅七十餘人。合計一哨半。是時由保定調至之玉統領部下馬隊尙未至。團匪得信語。人曰。本期術成而後發。今事急。且試之。號召大眾。連日非焚教堂。即殺教士。紅光四起。橫屍徧衢。巨禍已成。警信疊至。當道於此。方悔初時之失算。然猶未拒官也。無何楊副戎督隊至。十九日遇團匪。知難理喻。與之戰。不及裝彈。幾覆軍。下令速退。匪襲其後。未數步。轉身發槍。皆應聲倒。殺匪甚多。次早屍可檢者得十八人。所謂二教師神通廣大。能赤手抵當槍炮者。亦與焉。餘匪逃時。回頭誓曰。必得楊某而後甘心。二十日副戎出。復殺十數人。及至二十三日。匪衆之裝束。大非昔比。巾帶皆紅色。衣紫衣。副戎領兵直前。大股匪復退去。蓋誘兵計也。副戎不悟。追過村落。深處伏發。馬驚竄。副戎先中槍。刺傷胸部。急以刀抵格。而第二槍已中喉。不可救矣。從員二名。亦被刺死。查辦團匪之某道。即以馬隊覆沒。楊副將亦死之語。飛報直督裕祿。即日撥馬隊一營。次日復撥耿鳳鳴所帶之練軍二營。相繼往。二十七日更添派馬隊二營。步隊一營。○廿五日。清苑縣附近某村團匪殺斃天主教民六十餘人。京中順直門外南下窪地方。時有團匪教童子習拳。日凡數起。或向詰問。則自稱爲扶清滅洋之大會。並云京中大員某某。京外大員某某。皆入會爲頭目。吾輩奉命教練童子若干萬人。保定南城旁之文昌宮及東關王家胡同。均有愚民集衆練拳。日盛一日。一遇教民。便加非禮。○廿八日。京城四處徧貼揭貼。聲稱二十九日將